


ALOYSII VALENTI
AB INTIMO PONTIFICIO CUBICULO
IN FUNERE
JOANNIS V.
LUSITANIAE REGIS FIDELISSIMI
ORATIO
HABITA IN SACELLO QUIRINALI IV. ID. NOV.
CORAM
SANCTISSIMO DOMINO NOSTRO
BENEDICTO XIV.
PONT. OPT. MAX.



ROMAE
ANNO JUBILAEI MDCCL.

EXCUDERANT NICOLAUS, ET MARCUS PALERINI
SUPERIORUM FACILITATE.



JOSEPHO
 LUSITANORUM ATQUE ALGARBIORUM
 REGI FIDELISSIMO.

ALOYSIUS VALENTI
 D. N. M. Q. E.



MALE fane ageretur cum
 praeclarissimis viris ,
 si, ut patrimonium ,
 ita omni patrimonio praestantiorum glo-
 riam rerum gestarum filiis relinquere
 A 2 suis

(IV.)

fuis non possent . Carerent enim fructu laborum suorum , qui a parentibus in ornandis liberis propter quendam naturae sensum maximus omnium suavissimusque percipitur . Sed manat ad posteros paterni splendor nominis , manant exempla , & quasi semina virtutum ; neque Tu , JOSEPH Rex , a Patre tuo solum Regni istius florentissimi , sed amplissimae gloriae haereditatem accepisti , quam per Te ipsum quotidie fieri auctiorem Lusitani jam sentiunt , & longinqui audiunt atque obstupescunt . Quapropter laudationem funebrem JOANNIS V. Regis , clarissimi Patris tui , dudum a me coram Pontifice Maximo , Eminentissimisque Patribus habitam , dum in Pontificio Sacello solemine eidem funus fieret , & nunc in manus hominum prodeuntem ad Majestatem tuam cum deferō , illud deferō , quod , vel sine hac nuncupatione

(V.)

tione mea , ad Te unum , quodam veluti haereditario jure pertinere videatur . Habes in eadem oratione non illas quidem pro dignitate expressas , sed leviter adumbratas laudes unius Religionis , quæ tanta in Patre tuo ac tam mirabilis fuit , ut , non qui eam prædicet , assentator , sed qui non magnopere prædicet , aut impius , aut malevolus existimari possit . Fuerunt in eo permulta alia virtutum ornamenta dignissima sane quæ commendentur memoriæ hominum sempiternæ . Quis enim singularem ejus in explicandis negotiis prudentiam ? Quis in privatis moderationem , in publicis splendorem ? Quis in Belli Pacisque artibus exploratam ingenii solertiam ? Quis acquitatem , ac sapientiam incredibilem ignorat ? Cui inaudita est magnitudo quaedam , & quasi animi exaggeratio , a qua nihil humile , nihil obscurum , nihil non amplum atque

(VI.)

excelsum proficifcebatur ? Sed hujusmodi rerum commemoratio multiplex & copiofa non erat illius nec temporis nec loci . Quamquam fi recte judicare velimus ab uno illo laudis genere , quod totam rapuit , & quodammodo abforbuit orationem meam , reliquae illius laudes omnes profluxerunt ; neque Chrifiano Principi , hoc praefertim tempore , nifi tuendae atque exornandae Religionis alius eft curfus ad Gloriam .

Caetera enim habent fortaffe quandam speciem gloriae vulgi opinione excitam ; at veram , solidam , fempiternam gloriam non habent . Hoc tu idem fentis & praefas , JOSEPH Rex , egregius imitator Patris , Majorumque tuorum . Perlatum eft enim ad nos , atque in ore & fermone omnium percrebuit , quam praeclara regnandi initia , & fundamenta pofueris , unde maxime ad domesticam gloriam cumulandam niteris .

(VII.)

ris . Sed illa praesertim mirum in modum celebratur tua singularis adversus omnes humanitas , ac pene incredibilis clementia , qua ego fretus id , quodcunque est , operae , ac lucubrationis meae Augusto Majestatis tuae nomini consecrare non dubitavi . Hoc igitur summa abs Te observantia summisque precibus peto , ut hanc Orationem , qualiscunque ea tandem est , & me ipsum , tua illustri ac regia clientela amplissimoque patrocinio non indignum existimes . Quod si assequar , ut benignitas mihi tua pollicetur , satis magnum videbor cepisse fructum laboris ac industriae meae .



I M P R I M A T U R,

Si videbitur Reverendissimo Patri Magist.
Sacri Palatii Apostolici.

F. M. De Rubeis Arch. Thars. Vicefg.

I M P R I M A T U R,

Fr. Joseph Augustinus Orfi Sac. Pal.
Apost. Mag. Ord. Præd.



EMINI video esse dubium ,
BEATISSIME PATER , quin
antiquissima consuetudo lau-
dandi Christianos Reges , dum
haec illis iusta funeris perfol-
vuntur , aptum quoddam ora-
tionis genus desideret , non
illud quidem profano cultu
exornatum , & in quascun-

que laudes diffusum , sed grave , sincerum , plenum re-
ligionis , plenum veritatis , atque ejusmodi , ut ab hac
tanta loci , temporis , personarum dignitate atque am-
plitudine non abhorreat . Dicendum est enim ex hoc
loco omnium ad agendum sanctissimo , & prope Aram
ipsius Dei , cui eodem tempore maxima caeremonia
Sacrum fit pro salute illius sempiterna , de quo sermo
est ; & apud Te dicendum , BEATISSIME PATER , qui
haberis Divinae inter homines veritatis caput atque
fons ; & in hoc confessu Patrum amplissimorum , qui
momenta officiorum omnium non populari ratione ,
sed Evangelii , rectissima quasi trutina , expendunt .
Quare opum splendor , generis antiquitas , potentia
dominatus , Imperii propagatio , instructi exercitus ,
ornatae classes , praelia , victoriae , triumpho , hae lau-
des , quaecunque sunt , quae certe cum barbaris Prin-

A 5

cipibus

cipibus atque a nostrae religionis gravitate abhorrentibus communes sunt, dominantur in concione multitudinis imperitae, valeant ad famam atque admirationem vulgi; at in Christiano Rege collaudando tacitae praetereantur, neque in hoc religionis, & sapientiae sacrarium admittantur. Quicquid pie, sancte, religiose gestum est, id unum commemorandum ex hoc loco, atque ita commemorandum, non ut vana quaedam laudum ostentatio, sed ut Christianae spei solatium optimum verissimumque habeat. At in quo nam hujusmodi praedicationis argumentum opportunius esse potest, quam in JOANNE V. Lusitanorum atque Algarbiorum Rege Fidelissimo, cui, tanto Reipublicae malo dudum erepto, amplissimum hodierno die, magnisque & immortalibus illius erga Romanam Ecclesiam meritis debitum funus persolvitur? Mihi quidem totam ejus vitae rationem animo complectenti, ac multis praeclarisque rebus cognitam & spectatam ejusdem religionem consideranti apte in eum cadere videntur, quae pium olim Israelitarum, Ducem Nehemiam vere de se praedicasse, divinis literis traditum est. Hoc enim a Deo fidenter prolixèque precabatur, ut ne oblivisceretur, sed meminisset in bonum, quicquid in domo Domini, & caeremoniis ejus, & in ordine Sacerdotali, & Levitico sancte accurateque fecerat. Videtis jam, ut arbitror, quam bene ad excitandam spem & pietatem vestram hae laudes tanto Regi conveniant, quem domus Dei instauratorem, quem custodem caeremoniarum, quem Ordinis Sacerdotalis defensorem & amplificatorem, verissime possumus appellare. Atque utinam quantum huic loco, tempori, personis accommodatum est

O R A T I O . II

est orationis meae argumentum , tantum digna esset argumento oratio , digna Christiani Regis verissimis laudibus , digna auribus vestris !

Est Religio , quae pio castoque praepotentis Dei cultu continetur , una sit eademque universorum ; tamen si externam ejus quasi formam & speciem consideremus , facile quidem certe intelligemus , non eandem in privatis hominibus atque in magnis Principibus esse oportere . In illis enim latere quodammodo atque ad obscurum & tacitum quendam animi cultum referri unice potest ; at in his , qui in excelso loco positi ad reliquorum exemplum diligentius observantur , prodeat in publicum necesse est , majoremque splendorem obtineat dignitatis suae . Quare cum de JOANNIS Religione disputo , illam dico , quae splendida , quae magnifica , quae vere regia dici potest . Atque illud etiam contendo , nunquam hanc potuisse talem ac tantam existere , nisi altioribus quibusdam solidae atque intimae pietatis radicibus niteretur ; praesertim cum nihil fictum , nihil simulatum cum omnibus in rebus , tum maxime in Religione possit esse diuturnum . At quartus annus est & quadragesimus , ex quo tempore JOANNES regnavit , atque ita regnavit , ut jam non sua , sed unius Religionis causa regnasse videatur . Quid enim universo hoc tempore omnis ejus actio , ratio , cogitatio , tota denique vita fuit aliud , quam constans , perpetua , illustris exornandae Religionis voluntas ? In quo evigilaverunt curae illius magnae atque assiduae , quo divitias , opes , autoritatem regiam contulit , nisi ut magnificentiam Templorum , splendorem Caeremoniarum , Sacerdotum commoda atque auctoritatem augeret ?

A 6

Atque

Atque ut a Templis ornamentisque Templorum incipiam, quam praeclara mihi, quam magnifica laudatio ostenditur. Illud meminisse JOANNES videbatur, quod Rex post homines natos sanctissimus David de nobili Hierosolymitano Templo aedificando cogitans, secum olim locutus dicitur: Mene diversari in domo lauta atque perampla? Mene habere vestibula ornatissima, tecta laqueata, pavimenta marmorea, thalamos, porticus, hortos, plena elegantiae ac dignitatis omnia; Arcam vero Domini relinqui in sordibus obscuri atque angusti loci? Indigna sane res, neque ullo modo ferenda. Quicquid mihi regalis est opulentiae, quicquid auri, argenti, divitiarum, totum hoc, quodcunque est, quod a summo bonorum omnium largitore Deo est, id ego ad aedificandum Templum illius sanctum atque augustum deferam. Id cogitavit David; atque hoc idem JOANNES Rex & cogitavit, & fecit. Dici non potest, quot ille Tempora refarcienda, adornanda, e fundamentis extruenda atque aedificanda curaverit. Quae Provinciae sunt, quae Oppida, quae Civitates non in Lusitania solum, sed in extremis Indiarum Regnis (quae in Lusitanorum Regum potestate ac ditione sunt) ubi non multa extent regiae illius munificentiae atque religionis vestigia? Erant in latissimo Brasiliæ Regno novi quidam Episcopatus constituendi, maximo cum illorum Populorum commodo ac bono. Ille gravissimus autor ad instituendam, diligentissimus hortator ad promovendam, liberalissimus adjutor ad rem perficiendam fuit. Ille Romani Pontificis in tam difficili negotio jus, auctoritatemque imploravit. Ille Belamensem, ille Mariannensem, ille Sancti Pauli Episcopatus fundavit, per-

O R A T I O .

13

perhonorificis Episcopo cuique stipendiis ex *Ærario* regio attributis . Ille in ipsa Sancti Pauli Dioecesi sacram *Ædem* primariam a solo aedificavit . Ille *Ma-phrae Templum* , totum ex descriptione celeberrimi hujus , quod Romae Sancto Petro dicatum admiramur , posuit , auxit , perfecit . Intelligitis permulta a me dici brevius , quam rerum magnitudo & copia postulare videatur . Sed vestrae sapientiae est , tacita cogitatione colligere , quid immensa haec aedificatio Templorum valeat . Adde amplissima Sacerdotia : adde censum dotemque perpetuam : adde multam sumptuosam atque omne genus ornamentorum .

Et ornamenta quidem plurima plurimique pretii quid ego hic commemorem ? Completi sunt adhuc oculi animique vestri aspectu jucundissimo rerum pulcherrimarum , quas Romae , in hoc ipso magnificentissimo Religionis domicilio , infinito sumtu , ad miram artis elegantiam fieri curavit . Vos Candelabra ex auro & argento affabre facta : vos Thuribula , Acerras , Lychnos peniles , Calices , Cruces , & sacrorum quicquid est Vestimentorum mirabili opere atque splendore perfectum aspexistis . Nam Sacellum illud marmoreum elegantissime constructum , antequam Roma in Lusitaniam usque navibus deportaretur , nemo fuit quin cupide studioseque viseret , neque tamen visendo satiari posset . Opus sane memorabile ac dignum tanto Rege , dignum ingenio Artificum Romanorum , atque illo maximo totius conventu ac plausu Civitatis .

Neque vero splendidae hujus Religionis monumenta pauca illa aut rara , sed innumerabilia & prope continua fuerunt , vix ut eorum iniri ratio atque e

ad

ad nos pervenire memoria possit. Quae quidem tam multa tamque magna perfecisse, Lusitanae opulentiae; cogitasse autem singularis, ac omni laude dignissimae Religionis fuit. An si tot tantaeque ex novo illo Orbe terrarum exportatae divitiae in Theatra, in Arcus, in Regales lautiores Aedes extruendas, si in venationes sumtuosas, si in exercitus, si in classes ad perniciem hominum comparandas abiissent; haberet JOANNES magnificentiae suae admiratores & praecones plurimos: quod autem Divino quodam consilio, ac sapientia praeditus ingentes thesauros non ambitioni, non avaritiae, sed instrumenta praestiterit religioni atque virtuti, non erit multis verissimisque laudibus condecorandus? At vero neque Constantinum illum magnum, neque Theodosios, neque maximos Reges, ac Principes, quorum est litteris celebrata Religio, aliam ob causam tanta in laude positos videmus, nisi quod munificentiam suam regiam ad cultum DEI OPT. MAX. augendum exornandumque transtulerunt. Erat, erat hoc piae liberalitatis decus ex antiquis annalium monumentis repetendum, nisi JOANNES Rex perfecisset, ut illud jam non memoria, sed oculis prope nostris contueremur.

Et quoniam perbelle accidit, ut Theodosiorum mentionem facerem, quanta est JOANNI cum Junio praesertim Theodosio in hoc laudis genere, & quam gloriosa similitudo! Etenim alterum cum altero si conferamus, paria in utroque ornandae Ecclesiae studia, parem in sacris diligentiam, omnia denique religiosa utriusque cogitata, consilia, & facta prope eadem cognoscemus.

Sed hoc eximium certe ac singulare; quod sicut
Theo.

O R A T I O .

IS

Theodosius Byzantinam Ecclesiam ad illum honoris gradum extulit, qui a Romano proxime abesset, ita JOANNES Ulyssiponensi Ecclesiae majora Patriarchalis insignia dignitatis deferenda curavit. In quo tamen multo laudabilior JOANNES quam Theodosius fuit. Quod enim Graecus Imperator, vix non prohibente, id Rex noster optimus egit, non consentiente solum, sed honorificentissimum hac de re Diploma concedente Romano Pontifice, unde Ecclesiasticae, quidquid est amplitudinis ac splendoris, dimanat. Itaque religionis gloriam debitae Christi Vicario obedientiae laude cumulavit. Quanquam haud scio, utrum Ulyssiponensis an Romanae Ecclesiae causa gloriosum consilium illud suscepisse videri possit. Hoc scio, quod est utique verissimum, & nemini non cognitum atque perspectum, flagrasse hominem incredibili cupiditate hanc Orbis terrarum sanctissimam pulcherrimamque Civitatem visendi. Quod cum propter occupationem Regni non potuisset, haud falso dixerim, voluisse illum (quod amatores solent desiderio rerum carissimarum) in Ulyssiponensi ornatissima Ecclesia habere semper ob oculos positam Romanae hujus adumbratam imaginem, qua desiderium suum levius toleraret.

Atque hinc profectum arbitror, nihil ut sibi optatius, nihil jucundius accideret, quam ut suis in Templis sacra omnia fierent, non solum ritu atque instituto, sed apparatu ipso & magnificentia Romanorum.

Jam vero quanta in sanctissimis caeremoniis obcundis, & quam incredibili diligentia fuerit, etsi ad famam atque admirationem omnium manavit, tamen

men

men hoc loco silentio praeteriri non debet . Illa omittenda potius , quae in vulgari quadam & communi religionis laude posita videntur . Fuisse neminem in adeundis Divinis Mysteriis majore assiduitate ac reverentia , diem fuisse nullum , quo die augustissimum atque immortale Sacrificium ad homines Deo conciliandos divinitus institutum , praesente se , fieri non curaverit . Haec , inquam , non praedicanda in tanto Principe , de cujus Religione video vos nova quaedam , incredibilia , inusitata desiderare . Sed quid magis inauditum , atque hac praesertim aetate , quae ad intolerabile quoddam Divinarum rerum fastidium delabitur , quid magis praeter consuetudinem , quam ea autoritate , potentia , amplitudine Regem tantam , habuisse peritiam caeremoniarum omnium , ut , si quid in iis vel dissolute , vel negligenter admissum fuisset , statim aspectu ipso & voce etiam atque imperio reprehenderet ? Illustre sane atque admirandum religionis exemplum quo visa sunt renovari heroica illa tempora , cum Reges qui erant , iidem & summi Sacerdotes essent . Quare nolite dubitare , quin in Lusitanis Templis sacra quaeque fierent ita caste , rite , pie , sancte , auguste , ut admonerentur homines magnam in illis vim , magnumque numen contineri .

Sed tantum JOANNIS in Divinis caeremoniis studium diligentiamque dum laudo atque demiror , erunt fortasse qui improbent atque contemnant . Hoc praedicationis genere laudari Regem non solere : perparvi ac jejuni animi fuisse in tanta Regni procuratoris levitia haec & exigua consuetari . Quasi vero aut in pio Rege collaudando non ego veritatem quaeram , sed sermonem famamque popularem ; aut illa
exigua

O R A T I O .

17

exigua videri possint , quibus Dei Optimi Maximi religio sancta atque augusta continetur . Sed in huiusmodi genus hominum apte quadrat responsum illud , quo Rex David temeritatem conjugis fregit sibi petulanter insultantis , propterea quod in triumphali illo Arcae Domini ingressu laetitia elatus saltavisset . *Ante Dominum* , inquit , *qui elegit me potius , quam Patrem tuum , & quam omnem domum ejus , vilior fiam , quam factus sum & gloriosior apparebo .*

Possẽ eadem haec de JOANNE praedicare magnifice ; sed vos potius , vos , inquam , viri Lusitani appello ; vestram hic fidem imploro , atque ex vobis quaero , utrum JOANNIS religio valde diligens quicquam de publica regni administratione , ac felicitate detraxerit . Date vos praeclarum testimonium , qui pietate caeteros vicit , eum tamen in iis , quae ad officium boni Regis pertinent , nemini concessisse . Quin etiam vos intellexistis , ab una ipsa religione existere atque efflorescere justitiam , liberalitatem , comitatem , aliasque virtutes effundentes sese ad publicam utilitatem , & commune bonum . Ex hoc eodem fonte illa fluxerunt : patere faciles ad eundem aditus : liberas esse querimonias privatorum : nihil verbis , nihil re apertius ostendere , quam sibi omnium vestrum salutem , liberos , famam , fortunas esse carissimas . Hinc mercaturae quaestuosiores invec̃tae : viae undique stratae : fluminum & Tagi praesertim indocilis cursus ad publicam commoditatem deflexus : Gymnasia undique patefacta : Academiae excitatae : Juvenes bona spe atque ingenio praediti alias in Urbes , quasi ad mercaturam optimarum artium , regali impensa missi , ac , non inanes cum rediissent , annuis stipendiis cohonestati :

stati : Puellae ingenuae , ne in turpi egestate con-
nescerent , honestissime collocatae . Hinc in re do-
mestica quaesita laus continentiae , in publica digni-
tatis ; & praesertim suis in Legatis quos ad Reges &
Principes eo splendore , cultu , ac ornatu mittebat ,
ut Lulitani Imperii amplitudini , ac magnificentiae
conveniret . Quae quidem liberalis species publicae
majestatis posita in oculis exterorum non habet ina-
nem quandam ostentationem , sed recte intelligentium
judicio habet gratiae plurimum , nec parum authorita-
tis . Hinc supplicum misereri : benemerentibus cumu-
latiorem gratiam referre : animadvertere in malos &
nocentes : fidei summam rationem habere : curare ;
nequis eorum , quibus suorum consiliorum ministris
utebatur , aut pretio , aut metu , aut gratia a bono
& aequo deduceretur . Non finitimis molestum , non
peregrinis inhospitalem esse , non plebem tanquam
abjectissimam pecudem tractare duriter atque inhu-
maniter : nihil injuste , nihil impie facere , nihil po-
tentia non ferenda . Quae alia bene & feliciter re-
gnandi ratio est , nisi haec est ? Nam quod foedissi-
mi illius belli flamma , qua totam fere Europam ,
conflagrasse vidimus , & vero etiam heu sensimus ,
ad vos non modo non pervaserit , sed ne aspirarit
quidem ; id ego non casu , non natura loci , non
inertia , sed ratione , sed consilio , sed rectissimo reli-
gionis sensu factum dico . Non enim ignoratis quot
ille amplissimis praemiis , & proferendi Imperii pol-
licitationibus ad societatem belli vocatus sit . Cujus
tamen fertur responsum illud omnium sermone & fa-
ma celebratum : Quod regnum sibi liberaliter con-
cessisset Deus , iis esse finibus contentum : nolle se
im-

immisceri iis bellis , quae pro religione cum suscepta non sint , victoribus aequae ac victis accidunt calamitosa . Praeclara vox magnae index moderationis animi , & Christianae pietatis testis . An si ipsa per se Religio loqui posset , putatis vocem aliam missuram , quae magis sanctissimae Christi disciplinae atque institutis conveniret ? Quid si Religio armis dimicare jubeat , & ad bellum vocet pro Christianae Reipublicae salute justum , necessarium , gloriosum ? Adest prompto atque erecto animo JOANNES REX , & memor dignitatis suae , memor rerum a Majoribus gestarum , CLEMENTIS XI. tum maxime ad Christianae Reipublicae defensionem excubantis voci obtemperans , in tetro illo Corcyrensi bello & periculoso classem omnium instructissimam ornatissimamque submittit . Cujus adventu Corcyram , nostrae propugnaculum libertatis , obsidione solutam , Italiam vero & hanc Urbem ipsam periculo liberatam vidimus . Eadem hortante Religione , atque , ut ita dicam , canente classicum , arma suscepit adversus ejusdem hostes teterrimos , & Goam pene labentem ab interitu vindicavit . Audistis jam Brasilienses , audistis Tingitanos populos nefario adversus Catholicam Fidem odio concitatos . Hos ille aut ita subegit , vix ut extent , aut ita domuit , ut quiescant , aut ita pacavit , ut sua (quid suam dico ?) ut Religionis ipsius victoria laetentur . Haec trophaea sunt Christiani Principis omnium pulcherrima , quae vel ex hoc loco verissime collaudari & possunt & debent .

Veniant nunc nimiae JOANNIS religionis reprehenses , & vel ipsi judicent , utrum e re magis publica sit , habere Principem superbia dominatus
ita

ita extollentem animos, ut Divina humanaque omnia contemnat, an sanctissimis caeremoniis deditum, addictum, obstrictum, & pie Regis Regum vim, majestatemque pertimescentem. Quam volunt egregia atque insignia documenta conquirant. Excutiant commentarios veterum ac recentiorum omnes, qui de optima regnandi ratione conscripserunt. Hanc esse civilis Prudentiae summam & caput, hanc veram, simplicem, & directam bene beateque regnandi viam invenient, si qui Reipublicae praeest maxime omnium Dei cultum & puram religionem tuendam ornandamque suscipiat. Nam si qui sunt in tanta opinionum pravitate, politici non re sed nomine, qui publicum bonum a Religionis bono disjungunt, ii quidem fundamenta convellunt humanae societatis, vitaeque communis; atque iidem etiam satis perspicuo documento refelluntur JOANNIS Regis pii, & felicissimi; cujus diuturnum Regnum opibus firmissimum, divitiis opulentum, gloria amplum, virtute honestum qui videt, sanctissimae religionis vim atque effectum videt. Etenim jam non vereor dicere, maximam ac singularem curam, in qua JOANNES versatus est, Divinos ritus caeremoniasque retinendi, mutua quadam ipsius Dei cura de illius Regni commodis ac tranquillitate fuisse remuneratam; praesertim cum Deum propitium placatumque redderent continuas preces obsecrationesque sacerdotum, erga quos mira fuit Regis nostri pietas atque reverentia.

Hoc enim tertium reliquum est, de quo brevissime disputem, & quod est, mea quidem opinione, maximum in maximis Regibus, germanae ac solidae pietatis argumentum. Nam quo alios homines
reli-

O R A T I O .

21

religionis causa verearis atque observes, commendanda est immanis quaedam superbia naturae, quae hominibus inesse solet, quanto vero magis iis, qui rerum omnium cum potiantur, sese quasi supra humanam conditionem positos timeri ab omnibus & coli vident. At JOHANNES nihil de sua potentia, nihil de majestate dominatus detractum existimavit, si amplificaret dignitatem & commoda Ministrorum Dei, cui communem etiam Regibus conditionem serviendi non recusabat. Neque audiendos unquam censuit qui sacerdotum ordinem fere semper in invidiam vocant, quo impune & Christianam pietatem convellant, & Rempublicam perturbent. At testes sunt cujusvis gradus sacerdotes, quos ille maxime honoratos esse voluit. Testes religiosae cujusque Familiae alumni, erga quod genus hominum sunt in oculis, sunt in auribus omnium regiae liberalitatis atque humanitatis monumenta.

At vero erga Romanum Pontificem, quem Religionis, & Sacrorum omnium Principem in terris divinitus constitutum intelligebat, quanta & quam non obscura Regis veneratio fuerit, cum multis in rebus, tum maxime in excipiendo Legato Pontificio, qui ad Sinensium usque Regnum missus fuit, declaratum est. Cui cum omnia advenienti, & apud se commoranti honoris officia praestitisset, Navem praeterea bene ornatam dedit, qua iter pergens suum Legationem obiret cum dignitate. Sed quid ego de singulari hominis erga Romanum Pontificem voluntate, & observantia loquor Te coram, Te, inquam, BENEDICTE PONTIFEX, qui. si aliusquisquam, potes unus omnium optimus & gravissimus esse testis? Te enim tanquam verum Parentem suum dilexit unice,

Te

Te coluit impense , Te praecipuo quodam amicitiae genere complexus est . Tuam ille semper voluntatem pro lege , pro mandatis consilia , decreta pro oraculis excepit . Possem ego permultos nominare , in quos homines licet peregrinos beneficentiam suam Regiam contulit , non alio nomine quam vel levissimae commendationis tuae . Quid ? quod eam praecipuam curam suscipere visus est , ut perinde ac imple , ita nemo Princeps non esset erga Te optime animatus , quo mutua illa & ad Christianae Reipublicae felicitatem necessaria Sacerdotii & Imperii conjunctio nulla unquam re labefactari convellique posset . Id ut perficeret nullam operam , laborem , diligentiamque recusavit . Nam si quid tale incideret vel obscurum , vel suspiciosum , quod offensionem afferre aliquam posset ; statim ille & sponte sua interponere sese , mittere litteras diligentissime conscriptas , mittere homines usu rerum gerendarum & prudentia praestantissimos , qui evellerent initia dissensionum , spargerent semina concordiae ; curare denique ut si qua emerisset abalienati animi opinio , ea novo quodam majoris benevolentiae argumento obrueretur . Et miramur nulla amoris , nulla benignitatis officia ab amantissimo Patre erga obsequentem Filium posse proficisci , quae non abs Te , PATER SANCTISSIME , erga optimum Regem profecta sint ? Hoc illi testantur Ecclesiastica eruditione ac doctrina libri tui ornatissimi , quos propterea ipse Rex elegantius describendos edendosque curavit . Hoc illae declarant Epistolae tuae erga eum benevolentiae indices , & illa praesertim pulcherrima , qua receas accuratissimum Martyrologium non alteri quam JOANNI Regi

Regi inscriptum voluisti : ut quandiu monumentis ingenii tui habebitur honos , qui erit utique sempiternus , tandiu celebretur mutua haec , atque illustris conjunctio animorum vestrorum . Nam quid dicam de perhonorifica FIDELISSIMI appellatione , qua illum Regum Lusitanorum omnium primum condecorasti ? Fuit hoc Tibi sane jucundum , tanto Regi dare debitae laudis praemium , quod esset & summae illius erga Religionem fidei , & tuae erga illum voluntatis testimonium sempiternum . Fuit JOANNI gloriosum a tam laudato Pontifice ea insignia laudis accepisse , quae tantam praeferrerent auctoritatem , amoris ac judicii tui . Neque posteris ipsis non erit valde utile ad imitationem exempli habere non tam generis & dignitatis quam multo praeclarius nomen religionis atque virtutis .

Sed me repente de hac tua erga tam pium Regem voluntate dicentem , & plura dicere parantem , in ipso Orationis cursu reprimit ac perturbat dolor , quem ex interitu illius magnum accepisti . Hem ! Tuus ille benevolentia , studio , observantia filius : Ille Lusitanorum non Rex sed Parens : Ille sanctissimae Religionis defensor , custos , amplificator egregius atque immortalis occidit . O tristem sane ac miseram conditionem rerum humanarum ! Sunt hae quidem justae dolendi causae , at gaudendi aliae multo justiores . Et primum , quod alieno quidem Reipublicae semper , at certe opportuno sibi atque optatissimo tempore excessit e vita . Scimus enim per decem ipsos dies , qui supremum illius praecefferunt , ad exercitia , quae spiritalia vocantur , tota mente incubuisse ; ut bene omnino de eo sperandum sit , quem in meditatione ipsarum rerum

rerum divinarum beata mors interceperit . Quam ego mortis opportunitatem beneficii loco pono quo nullum majus homini dari possit a Deo ; sic ut ejusdem interitus non lacrymis sed gratulatione , non misericordia sed benevolentia prosequendus esse videatur .

Accedit solatium aliud doloris maximum , scilicet lectissima soboles , & JOSEPH praesertim Lusitanorum atque Algarbiorum Rex Fidelissimus , quo superstiti , ac tam bonis auspiciis capeffente Rempubicam , non Lusitania Parentem suum , non Catholica Religio defensorem ac vindicem , non Tu , BEATISSIME PATER , obsequentissimum Filium amisisti . Haec quidem omnia leniunt ac mitigant dolorem nostrum , & , quod caput est , bene nos de sempiterna illius salute ac felicitate sperare jubent .

Quod si humanum aliquid ab eo alienum non fuit , si quid maculae ex hac contagione terrena contractum est , id omne ad eluendum expiandumque valeat apud misericordiarum Deum commemoratio rerum pulcherrimarum , quas in Templis aedificandis atque exornandis , quas in Caeremoniis ob-eundis magnifice , splendide , pie , diligenter fecit . Valeant castissimae preces obsecrationesque Sacerdotum , quorum ille dignitati mirabiliter favit , rationibus nunquam est adversatus . Valeat praesertim Sacrificium hoc solemne atque augustum ; quod coram PONTIFICE MAXIMO , & in summorum Antistitem confessu , loco & ad petendum & ad impetrandum aptissimo , fit pro salute illius , ut ipse Deus Maximus atque Optimus ; sicut olim Nehemiae illi Judaeorum Duci religiosissimo , ita JOANNI vertat in bonum quae fecit in Domo & Caeremoniis ejus , & in Ordine Sacerdotali & Levitico .

F I N I S .

